



06. oktober 2021

UKA2021/19  
Erik Jensen

**Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaata allangortinneqarnissaa pillugu Inatsisartut inatsisaat..**

(Aningaasaqarnermut Nunamullu Namminermut Naalakkersuisoq)

Matumuuna Kommunit aammalu Namminersorlutik Oqartussat missingersuutaat naatsorsuutaasalu, Inatsisartut inatsisissaata allangortinnissaat siunertaralugu Inatsisartuni inatsimmi allangortinneqarnissaat siunersuutaralugu Naalakkersuisut siunnersuutaat Siumumit imaattumik oqaaseqarfigissavarput.

Siullermik Siumumiit oqaatigissavarput Aningaasaqarnermut Nunamullu Namminermut Naalakkersuisoq aningaasaqarnermut akileraaratarnermullu ataatsimiisitaliamit una saqqummiussaq pillugu saqqummiivigineqarnikuugatta. Tamannalu Siumumiit iluarisimaarparput.

Inatsimmi allanguutissatut siunnersuusiornermi ilaatigut siunertarineqarpoq Kommuunit aammalu Namminersorlutik Oqartussat missingersuusiorneranni, ataqatigiinngitsumik missingersuusiorsinnaanerup pinngitsoortinniarnissa. Tassa innuttaasut amerlassusaannut naapertuunnerusumik, aammalu aningaasaliissutit suliassallu naapertuunnerusumik aaqqiissuteqarsimasarnissaq ilaatigut atorneqarsinnaanissaa qulakkeerniarneqarnerulluni. Tamatumani naatsorsuutit aallaaviginagit kisiannili missingersuusiorsimanerit aallaavigalugit aaqqiisinnaanerit siunertarineqarlutik. Aammattaaq siunertarineqarluni siunissamut ungasinnerusumut isigisumik aningaasaliiffissatut siunertarineqartut inuiaqatigiinnilu imminut akilersinnaasutut nalilerneqartut peqqutigalugit missingersuusiornermi ilaatinneqarsinnaanerit.

Inatsisissami siunnersuummi aamma siunertarineqarpoq pisortat pisassaattut nalunaarsorsimasut, akilerneqarnissaallu ilimanaateqangitsut ukiunilu arlalinni uninngasimasut, soorlu A-bidrag-imik taaneqartartut, ukiut marluk iluanni nalikillilerneqarsinnaalissasut – akilersuiunerit ingerlajunnaarsimasut uninngatiinnarnagit, naatsorsuutit eqqornerusumik iluseqarnissaannik siunertalimmik.

Siumumiit maluginiarparput tusarniaanermi akissutini kommuunit sisamap ernumanartoqartitsinerat. Tamatumani meeqqanut, ilinniartitaanermut aammalu inunnik isumaginninnermut tunngasuni pisariaqartitsineq aallaavigalugu politikikkut anguniakkat aallaavigalugit aningaasaliilluni ineriartortitsinnaanerit killilersorneqarsinnaanissaat.



Naalakkersuisup saqqummiussinerani oqariartuutigaat ineqarnermut aserfallatsaaliinissamut aningaasat kinguaattoorutaasut angummaffiginiarnissaat assut unammillernartoqartartoq. Tamannalu aaqqiiviginiarlugu aningasaliissutaasussat pisariaqartinneqartut annertunerusumik qulakkeerneqarsinnaanissaat siunertarlugu siunnersuut aamma suliaasimasoq.

Siumumiit isumaqarpugut Kommunit Namminersorlutillu Oqartussat missingersuutaat naatsorsuutaasalu pillugit inatsimmi allannguutaasussat, pitsaaqutai pitsaanngequtailu qulaajarluarsimanissaat siunertarlugu ataatsimiisitaliami susassaqartumi sukumiisumik suliarineqaqqaassasut.

Siumumiik taamatut oqaaseqarluta siunnersuut Aningaasaqarnermut Akileraartarnermullu ataatsimiisitaliami suliarineqarnissaa innersuussutigaarput.

Qujanaq.